



СЭЛЭНГЭ АЙМАГ  
АЛТАНБУЛАГ СУМЫН ЗАСАГ ДАРГЫН  
ЗАХИРАМЖ

2021 оны 05 сарын 17 өдөр

Дугаар А/108

Алтанбулаг

Үндэсний аюулгүй байдлын үзэл баримтлал,  
хууль тогтоомжийн хэрэгжилтийг хангах  
ажлыг эрчимжүүлэх тухай

Монгол Улсын Засаг захиргаа, нутаг дэвсгэрийн нэгж, түүний удирдлагын тухай хуулийн 29 дүгээр зүйл 29.1.6 "а", 29.2, 39.1, Үндэсний аюулгүй байдлын тухай хуулийн 4 дүгээр зүйлийн 4.1, 11 дүгээр зүйлийн 11.1, 12 дугаар зүйлийн 12.3, 16 дугаар зүйлийн 16.1, Төрийн болон албаны нууцын тухай хуулийн 6 дугаар зүйлийн 6.1, 6.2, 11 дүгээр зүйлийн 11.1, Монгол Улсын Их Хурлын 2010 оны 48 дугаар тогтоолоор батлагдсан "Монгол Улсын Үндэсний аюулгүй байдлын үзэл баримтлал"-ын 4.2.1, 4.2.6, аймгийн Засаг даргын 2021 оны А/149 тоот захирамжийг тус тус үндэслэн ЗАХИРАМЖЛАХ нь:

1.Хуулиар хүлээсэн чиг үүрэг, бүрэн эрхээ хэрэгжүүлэхдээ үндэсний язгуур ашиг сонирхлыг эрхэмлэж, Үндэсний аюулгүй байдлын үзэл баримтлал, Үндэсний аюулгүй байдлын тухай хууль тогтоомж, зөвлөмж, чиглэлийн хэрэгжилтийг хангаж, холбогдох арга хэмжээг үйл ажиллагааны төлөвлөгөөндөө тусган хэрэгжүүлэхийг төр, төсвийн байгууллагын удирдлагуудад үүрэг болгосугай.

2.Төрийн болон албаны нууцыг хамгаалах, мэдээллийн аюулгүй байдлыг хангахад онцгойлон анхаарч, мэдээллийг олж авах, түгээх, ашиглах, хадгалах хамгаалахтай холбоотой эрсдэл бий болохоос урьдчилан сэргийлэх, байгууллага төрийн албан хаагч бүрийг төрийн албаны цахим шууданг ашиглаж хэвшүүлэх, цахим халдлага, зөрчлөөс урьдчилан сэргийлэх, мэдээллийн аюулгүй байдлаа хангах мэдлэг ойлголттой болгох, хууль тогтоомж, стандартыг хэрэгжүүлэх, тохирсон арга хэрэгсэл техник технологийг эзэмших, сайжруулах арга хэмжээг авч хэрэгжүүлэхийг төр, төсвийн байгууллагын удирдлагуудад тус тус даалгасугай.

3.Төрийн албан хаагчийн ёс зүйн хэм хэмжээг чанд сахиж, төрийн албаны үйл ажиллагааг чирэгдэлгүй, алдаа дутагдалгүй явуулахад анхаарч, төрийн албан хаагчдыг авлига, албан тушаалын болон гэмт хэрэг, зөрчилд холбогдохоос урьдчилан сэргийлэх, ашиг сонирхлын зөрчлөөс ангид байлгах, соён гэгээрүүлэх олон талт ажил, арга хэмжээг Авлигын эсрэг хууль тогтоомж, хөтөлбөрийн хүрээнд төлөвлөн үр дүнтэй зохион байгуулж ажиллахыг төр, төсвийн байгууллагын удирдлагуудад тус тус даалгасугай.

4.Аймгийн Засаг даргаар дамжуулан Засгийн газрын Хэрэг эрхлэх газар, Гадаад харилцааны яамнаас зөвшөөрөл, чиглэл авалгүйгээр дур мэдэн гадаад улсын Засаг захиргааны нэгж, байгууллагатай хамтын ажиллагааны гэрээ, хэлцэл байгуулахгүй байхад анхаарч Монгол Улсын Засгийн газрын 2013 оны 169, 2017 оны 57 дугаар тогтоолыг мөрдлөг болгон хэрэгжүүлж ажиллахыг нийт төрийн албан хаагч, төр, төсвийн байгууллагын удирдлагуудад тус тус үүрэг болгосугай.

5.Эрчим хүч, дулаан, халаалтын төв, ус хангамжийн /ундны усны эх үүсвэр, гүний худаг/ харуул хамгаалалт, аюулгүй байдалд онцгой анхаарч, хамгаалалтын дэглэмийг мөрдүүлэх, баталгаат ундны эх үүсвэрийг хамгаалах, гол усны ай сав газрыг хамгаалалтанд тогтоосон журмын дагуу авах, түүх соёлын биет өв, дурсгалт газар, булш, хиргисүүр, байгууламж тоногдох, хулгайлагдах явдлаас урьдчилан сэргийлж, хамгаалалтыг сайжруулах ажлыг мэргэжлийн болон хууль сахиулах байгууллагуудтай хамтран хэрэгжүүлж ажиллахыг сумын орлогч (Х.Отгонжаргал)-д үүрэг болгосугай.

6.Сумынхаа нутаг дэвсгэрт ажиллаж байгаа сүм, хийд, археологийн хайгуул, малтлага, судалгааны ажил хийж буй экспедици, эрдэм шинжилгээний багийн үйл ажиллагаанд хяналт тавьж, хууль тогтоомжийн хэрэгжилтийг хангаж ажиллахыг Соёлын төвийн орон нутаг судлах танхимын ажилтан (Д.Насанбуян)-д даалгасугай.

7.Экологийн аюулгүй байдалд анхаарч, газрын доройтлоос урьдчилан сэргийлэх, ой, усны нөөц хомсдох, нутаг бэлчээр гандан хуурайших, цөлжих, хууль бусаар ан амьтан агнах, самар жимс, хориглосон ургамал түүх, байгалийн нөөц баялагийг сорчлон ашиглах, хүний буруутай үйл ажиллагаа нь байгаль орчинд сөрөг нөлөө ихээр үзүүлж байгаа зэрэгт онцгойлон анхаарч, хог хаягдлын менежментийг боловсронгуй болгох, иргэдийг соён гэгээрүүлэх, ой амьтан ургамал зэрэг байгалийн нөөц баялагийг судлах, хамгаалах, зохистой ашиглах хууль бус мод бэлтгэлтэй тэмцэх, нөхөн сэргээх, хүрээлэн байгаа орчны эсрэг гэмт хэрэг, зөрчлөөс урьдчилан сэргийлэх, таслан зогсоох ажлыг үр дүнтэй зохион байгуулж ажиллахыг Байгаль орчны хяналтын улсын байцаагч (С.Мөнхзул)-д үүрэг болгосугай.

8. Байгалийн аюулт үзэгдэл, болзошгүй гамшгийг тандан судлах, урьдчилан мэдээлэх, үер ус, ой хээрийн түймэр, галын аюулаас урьдчилан сэргийлэх, эмзэг байдлыг бууруулах ажлыг хамтран зохион байгуулж ажиллахыг Засаг даргын Тамгын газрын дарга (Ү.Янжиндулам)-д даалгасугай.

9.Хүнс, хоолны үйлдвэрлэл, үйлчилгээний газруудад мөрдөх эрүүл ахуйн болон үйлдвэрлэлийн зохистой дадал олгох, иргэдэд хүнсний аюулгүй байдлын талаар мэдлэг, мэдээлэл олгох, зориулалтын бус савны хэрэглээ, хор хөнөөлийг сурталчилах, хүнсний бүх үе шатанд бэлтгэл, боловсруулалт, хадгалалт, тээвэрлэлт, борлуулалтад хяналт тавьж, малын удмын сан, үр тарианы нутагшмал сортыг хамгаалах, гамшгийн үед хэрэглэх стратегийн хүнсний бүтээгдэхүүний нөөцийг бүрдүүлэх, хүн амын хүнсний эрэлт, нийлүүлэлтийг тогтвортой байлгах, тооцоо судалгааг гаргаж, хүнсний хангамж, аюулгүй байдалд онцгойлон анхаарч ажиллахыг Хөдөө аж ахуйн тасгийн дарга (Б.Буян-Өлзий), Мал эмнэлгийн тасгийн дарга (О.Чинчимэг)-д тус тус даалгасугай.

10. Нийгмийн эрүүл мэндийн салбарын хөгжлийг дэмжих, эрүүл аж төрөх ёсыг хэвшүүлэх, иргэний эрүүл мэндийн боловсролыг дээшлүүлэх, нийтийн биеийн тамир, спортоор хичээллэх, бие бялдраа чийрэгжүүлэх орчин, нөхцлийг бүрдүүлэх, хорт хавдар болон халдварт өвчний тандалт судалгааг өргөжүүлж, халдварыг эрт илрүүлэх, тархалтаас сэргийлэх, урьдчилан сэргийлэх эм, тарилга, вакцин, биобэлдмэлийн нөөцийг бүрдүүлэх, оношлох, эмчлэх, осол гэмтэл, мэргэжлээс шалтгаалах өвчлөлийг бууруулах, эх нялхасын эндэгдлийг гаргахгүй байх, эмнэлэгийн тусламжийг хүн амд шуурхай хүргэх зэргээр хүн амын эрүүл мэндэд онцгойлон анхаарч ажиллахыг Эрүүл мэндийн төвийн дарга (У.Энхбямба)-д, нийгмийн бодлогын мэргэжилтэн (Б.Мөнхзул)-д тус тус даалгасугай.

11. Энэхүү захирамжийн хэрэгжилтэнд хяналт тавьж ажиллахыг Засаг даргын Тамгын газрын дарга (Ү.Янжиндулам)-д даалгасугай.

ЗАСАГ ДАРГА



Н.ОТГОНЦОГ